



Avammut tunioraaneq pillugu Naalakkersuisunut susassaqtunullu sumulluunniit attuumassuteqanngitsumik nalilersueqqissaarluni inassuteqaasiortartussamik, Avammut Tunioraaneq pillugu Siunnersuisooqatigiinnik kingusinnerpaamik UPA2020-imi pilersitseqqullugit Naalakkersuisut peqquneqarnissaannik siunnersuut. Ilanngullugu siunnersuutigineqarpoq, avammut tunioraanerup siuarsarneqarneranut suliniutit ingerlaavartumik nalilersorneqartarnissaat siunnersuisooqatigiit suliassaannut ilaatinneqassasoq.

(Inatsisartunut ilaasortaqa Karl-Kristian Kruse, Siumut)

Partii Naleqqamiit siunnersuuteqartoq Karl Kristian Kruse siunnersuutaanut qutsaviginiarparput, imatullu oqaasertalerlugu.

Ukiorpassuarni nunanut allanut niuerneq qiviarneqarani ingerlanneqarnikuuvoq. Naatsumik taamatut nalilerusupparput.

Oqariartuummut tassunga tunngaviuvoq pisiassat eqqussuunneqartut tamarluinnangajaasa Danmark aqutigalugu nunatsinnut eqqussuunneqartarnerat.

Avammullu tunisassiatta amerlanerpaartaasa Danmarkimut niuerutigineqartarnerat aamma isertuussaanani.

Partii Naleqqamiit nunanut allanut niuerneq ajortussaqtartinnilarput, nunattalu ineriartornissaanut pingaaruteqarluinnarmat kaammattorusullugit nunanut allanut niuerfissarsiortartut.

Taamaattoq aamma allaffissornersuup millisarnissaa kissaatigalugu oqariartuuteqartuaannarpugut, nunatta inui artukkerniaannarlugit suliniuteqaratta.

Naleraqarluni siunnerfeqarneq inuiaqatigiit atorfissaqtartippaat, ersarissumik anguniagaqartumik politikkikkut aqutissiuissinnaaneq inuiaqatigiit ulluinnarni inuuniarnerannut iluaqutaasussamik.

Ullutsinni tamatta nalunngilarput qitiusumiit aqunneqarneq annertoq ingerlanneqartoq, innuttaasut akilersortagaat.

Kullorsuarmi najugallit akilersueqataapput Visit Greenland takornarianik tikisitsinissamut aningaasartuutaanut, naak takornarianik tikinneqartarnerat killeqarluni.



Tasiilami najugallit akilersueqataapput Naalakkersuisoqarfiup nunanut allanut imermik annissuinissamut ujartuinerannut aningaasartuutaannut, naak angalaqataasut nunatsinneeratillu Tasiilamut iluaqutissartaa killeqaraluaqisoq.

Aningaasartuutissat nunatta inuisa kivitassaas maanna siunnersuutigineqarpoq. Partii Naleqqamiillu apeqqusertariaqarparput suna siunertaralugu aningaasartuutit pilersinneqarusunnersut. Naalakkersuisut akissutaanni aamma erserpoq suliarpassuaqarlutik, siunnersuutaasup qulequtaasup iluani suliniuteqarlutik. Taamaattorli taperserlugu siunnersuut.

Immitsinnut aperisariaqarpugut:

- Ukiorpassuarni Visit Greenland akilersugarinikuullugu, sooq aatsaat mittarfissualiorutta takornarissat tikissinnaalissappat?
- Ukiorpassuarni Greenland Holding aammalu Greenland Business akilersugarinikuullugit sooq suli kivitseqataarusunngillat, nunanut allanut niuernerup annertusarneqarnerunissaanut?
- Avammut tuniniaaneq pillugu siunnersuisoqatigiit qanoq allannguisinnaappat, ukiorpassuarni Naalakkersuisut sulissutiginikuunngisaat pitinnissaanut?
- Allaammi qiviarutsigu folketingimi ilaasortaatitat suleqatigisinnaallugit, avammut niuernerq oqilisarnerunissaanut ukiorpassuarni periarfissaq taanna pimoorunneqarsimannngigaarmat, maanna aningaasartuutinik pilersitsiniarsarivugut.

Partii Naleqqamiit allaffissorneq naleraqanngitsoq siunnerfigissallugu tulluartsuorinngilarput taamaattumillu uunga siunnersuummut tapersiinnaanngilagut.

Mittarfissuit eqqartorneqarput, nunattalu ataqatigiikkunnaarnissaa eqqaaneqarani. Sooq aatsaat mittarfissualiorutta avammut niuernerq pilersissinnaalerasaassavarput?

Neriorsuuterpassuit, soorlu aalisakkat avammut toqqaannartumik niuerutiginissai eqqaaneqartuarput. Aalisagaq ataasiinnarluunnit suli timmisartooq aqputigalugu avammut niuerutigineqarsimannngilaq. Naak oqaatsit tamakku kusanartut? Naak oqaatsit timitaat?



Ukiorpassuarni akisussaaffinnik “angerlaassinissaq” eqqartorneqartarpoq, allaallumi qineqqusaarummiittarluni. Uani maluginiagassat ilagivaat nunanut allanut niuernerup ineriartortinnissaa periarfissinneqarsinnaammat, aningaasartuuterpassuarnik malitseqartariaqarani. Tassami oqartussaaffiit angerlaassassaanginnamik, akisussaaffigiligassaammata, taamaattumillu aaqqiivigineqarsinnaallutik Naalagaaffik peqquneqarneratigut. Taamatulli sulii piumaffigineqaratik Naalakkersuisut tungaanniit.

Nunatsinniillu qinigaasartut qinigassanngortittartullu aamma nunarput sinnerlugu sulisimanatik.

Siunnersuisooqatigiiffinnik arlalinnik peqareerpugut, assersuutigalugit Aningaasaqarnermut Siunnersuisooqatigiit aammalu Imigassaq Ikiaroorartullu pillugit Siunnersuisooqatigiit.

Aningaasaqarnermut Siunnersuisooqatigiit mianersoqqussutaat mittarfissualiornermut tunngatillugu tusaajumaneqanngillat Naalakkersuisunit aammalu Inatsisartuni aalajangiinerup ersersippaa siunnersuisartut amerlanerussuteqartut mianersoqqussutaat malinnagit akuersaartut. Sumut atussagatsigit siunnersuisooqatigiit tusaaneqarumangippata, nutaamik pilersitsinikkut aatsaat iluarsineqarsinnaagamik?

Imigassaq Ikiaroorartullu pillugit Siunnersuisooqatigiit mianersoqqussummik oqariartuuteqarput, imigassamut inatsimmut allannguutitut Naalakkersuisut siunnersuutaannut. Partii Naleqqamiit mianersoqqussutaat eqqarsarnartoqartillugit tusaavarput, takussavarpullu Inatsisartuni ataatsimiititaliat tusaatissatut tiguinnassaneraat. Siunnersuisooqatigiit mianersoqqussutaat tusaasinnaangikkutsigit, nutaamik pilersitsinissaq pisariaqarpa?

Siunnersuisooqatigiinnik pilersitsisoqassappat Partii Naleqqamiit takorusupparput aningaasartuutaasimasut ukiorpassuarni maangaanaq eqqakkatut nalilerneqarsinnaasut iliuuseqarfigeqqaarnissaat.

Partii Naleqqamiit qitiusumiit taperserusupparput, susassaqtut pilersitserusussappata siunnersuisooqatigiinnik. Takoreerparput politikikkut inerisaaneq qanoq iluatsinngitsiginersoq, politikikkut iluareqqusaarnermik aallaaveqaraangat.



partii naleraq

Nuuk 02. April 2019
UKA2019/34
Pele Broberg Partii Naleraq

Nunatsinni akisussaaffik kivissinnaanngikkutsigu, nunaqavissunik inuttalersorsinnaallugu, suliniutit pitsaasinnaagaluartut takussavagunaasit naleraqaratik niuerfimmuut ataasiinnarmut pituttuisut.

Taamatut oqaasertalerlugu Partii Naleqqamiit siunnersuut itigartipparput. Qujanaq.